


DECLARATION

3895

D V R O Y , E N

consequence de ses lettres patentes
du mois de May dernier, donnees
en faueur des Princes, Ducs, Pairs,
Officiers de sa Couronne, & tous
autres qui les ont assiste pendant
leur eslongnement de sa Cour.

*Verifiee en Parlement le 7.
Aoust, 1617.*



A PARIS,

Par FED. MOREL, & P. METTAYER,
Imprimeurs ordinaires du Roy.

M. DC XVII.

Avec Privilege de sa Maieste,



NOVVS par la
 grace de Dieu,
 Roy de France
 & de Nauarre,

A tous ceux qui ces pre-
 sentes lettres verront , Sa-
 lut. Puisque par nos lettres
 patentes du mois de May
 dernier , Nous auons re-
 cognu pour nos bons &
 loyaux subjets & seruiteurs
 les Princes , Ducs , Pairs,
 Officiers de nostre Cou-

ronne, & tous ceux qui les
auoient assiste, & qui
coniointement avec eux
s'estoient retirez de nostre
Cour, & pris les armes
pour s'opposer aux vio-
lances dont le Mareschal
d'Ancre se seruoit pour les
opprimer & ruiner: Il ait
esté de nostre Royale bon-
té de les traicter fauorable-
ment, & pouruoir à ce
qu'eux & ceux qui les ont
suiuis fussent restablis en
tous leurs biēs & hōneurs,
comme nous auons or-
donné par nosdites lettres:

Mais pource que par icelles nous n'auons pas particulierement pourueu au faict des procez ciuils ou criminels, qui durant le temps de leur absence pouuoient auoir esté iugez cōtre eux, nous ayant faict remonstrer souuent le dommage qu'ils en receuoient, Nous auons estimé de nostre iustice & de bonnairté de leur donner sur ce les prouisiōs necessaires. C'est pourquoy apres auoir deliberé de cet affaire en nostre Conseil, où estoient

aucuns Princes , Ducs,
Pairs , Officiers de nostre
Couronne, & principaux
Seigneurs de nostredit Cō-
seil : De l'aduis d'iceluy, &
de nostre certaine science,
pleine puissance & autho-
rité Royale, Nous auons
dit & déclaré, disons & de-
clarons par ces presentes
signées de nostre main, que
tous Arrests, iugemens &
procedures donnez (depuis
le premier du mois de Se-
ptēbre dernier) à l'encōtre
des susdits Princes, Ducs,
Pairs , Officiers de nostre

Courōne, & tous ceux qui
les ont assistez, en tous &
chacuns leurs procez &
differends, en quelque ma-
tiere que ce soit, ciuile ou
criminelle, en demandant
ou defendant, par deffaux
& contumace, tant en nos
Cours souueraines qu'au-
tres Iurisdictiones inferieu-
res, demeureront nuls & de
nul effect & valeur, remet-
tant les parties en leursdits
procez & differends, au
mesme estat qu'ils estoient
auparauant ledit mois de
Septembre dernier, iusques

à la verification de ces presentes. Et par ces mesmes defendons à tous nos Officiers de poursuiure ny molester les susdits Princes, & ceux qui les ont assiste pour raison de la prise des armes, & ce qui s'en est ensuiuy en faict de guerre, conformément à nosdites lettres du mois de May dernier, notamment pour prises de Chasteaux, Villes, maisons fortes, establissement de Bureaux, impositions de deniers, prises d'iceux, soit de nos tailles, aydes

aydes ou autres subfides,
 leuees de gens de guerre,
 coupe & enleuement de
 bois en nos forests, butins
 & rançons, prises de pac-
 quets, cheuaux, armes,
 meubles, vaisseaux de mer,
 & toutes sortes de marchā-
 dises appartenāns à qui que
 ce soit, pendant le dernier
 trouble & prise des armes
 depuis ledit premier iour
 de Septembre de l'annee
 passée, iusques à la publica-
 tion de nosdites lettres de
 Declaration dudit mois de
 May dernier en nosdites

Cours de Parlement : Cōme aussi de fabrication de monnoye faite de leur vaisselle d'argēt, à nos coings & armes, pourueu qu'elle soit du mesme titre & valeur, à quoy ils auroient esté necessitez pour payer leurs gens de guerre pendant ledit mouuement. Et que en vertu & consequence d'icelles & des presentes, ils ayent à remettre en liberté ceux qui pour les faiets cy dessus specifiez, & autres concernans ladite leuee d'armes & actes d'hostilité,

seroient detenus en nos prisons, conformement aux susdites Declarations, lesquelles nous voulons estre gardées & obseruées selon leur forme & teneur. Si donnons en mandement à nos amez & feaux Conseillers les gens tenans nos Cours de Parlement, Chābres de nos Comptes, Bailifs, Seneschaux, Preuosts ou leurs Lieutenans, & tous nos autres officiers & subjets qu'il appartiendra, que ces presentes ils facent lire, publier & registrer,

garder & obseruer selon
leur forme & teneur, En-
ioignant à nos Procureurs
generaux & leurs Substi-
tuts presens & à venir, y te-
nir la main, & faire toutes
poursuittes & diligences
pour l'execution de cesdi-
tes presentes, auxquelles en
tesmoin dequoy, Nous a-
uons faict mettre nostre
scel. Car tel est nostre plai-
sir. Donné à Paris le 24.
iour de Iuillet, l'an de gra-
ce, 1617. Et de nostre regne
le hui&iesme.

Signé,

LOVIS.

Et sur le reply est escrit,
Par le Roy.

DE LOMENIE.

Et scellé sur double queüe
du grand seal de cire iaune.

*Leües, publiees & registrees, oy
& ce requerant le Procureur ge-
neral du Roy, pour auoir lieu de-
puis le premier Septembre iusques
à la publication faicte le douzi-
esme May des dernieres lettres.
Ordonne la Cour que coppies col-
lationnees seront enuoyees aux
Bailliages & Seneschauſſees, pour
y estre leües, publiees & registrees
à la diligence des Substituts du
Procureur general du Roy, qui
certifieront auoir ce faict au mois.*

*A Paris en Parlement le septies-
me Aoust, mil six cens dix-sept.*

Signé, VORSIN.



